

3. november 2016

UKA 2016/31

Naqqiut

(24. juli 2016-imik ullulerneqarsimasoq taarserpaa, siunnersuuteqartup aqqa taarserneqarpoq)

Inatsisartut suleriaasianni § 33 naapertorlugu aallajangiiffigisassatut siunnersuut imattoq matumuuna ingerlatippa:

Nukissiorfinni Innaallagissamut, imermut kiassarnermullu assigiimmik akeqartitsinerup atuutseqqilersinnaanerata kingunerisinnaasai aammalu malitsigisaasussanut sunniutaasussat misissoqqissaarnerat nalilorsorneqarnerallu pillugit nalunaarusiamik UKA2017-imi saqqum-miusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Imanuelsen, Siumut)

Tunngavilersuut:

Innaallagissamut imermullu akinik Naalakkersuisoqatigiinnermut isumaqatigiissut naapertorlugu nammaqatigiinnermik naapertuilluarnermillu tunngaveqarnerusunik atuutsitsilernissamik Naalakkersuisoqatigiit isumaqatigiissuteqarput, tamannalu piviusunngortissallugu pisussaavugut.

§37 atorlugu apeqquteqaammi akissummi ilisimatitsissutigineqarnikuuvvoq kissamik pilersuinermut akinik assigiinnik atuutsitsisoqareersoq, innaallagissamulli imermullu akit nikerartuullutik aningaasanut inatsimmi takuneqarsinnaasutut sumiiffinni akit annerpaaffilerlugit minnerpaaf-filerlugillu inisisimatinneqartarlutik.

Innaallagissamut akit atuuttuni nunatsinni kWh-mut akiliuteqartarneq nikerarpoq, tassani maluginagassaalluni minnerpaaffissatut inisisimasut tassaasut illoqarfiiit annerusut, annerpaamillu naamaginangitsumik akiliuteqartartut tassaapput nunap sinnerani inukinnerpaaffinniittut.

Akitigut sunniutissat pillugit §37 atorlugu apeqquteqaammi akissummi Naalakkersuisut ilisimatitsippu allaffissornikkut misissueqqissaarnermik akit iluarsinissaanut misissuisoqartoq, taamaattumik akitigut sunniutissat ilanngullugit saqqummiunneqarnissaat kissaatigaarput.

Nunatsinni nuttarerit patsisaallutik sumiiffinni illoqarfinni nunaqarfinnilu innuttaasunik ikiliartorfiusuni ersarippu akitigut assigiinnerusumik atugaqartitsinissaq pisariaqartoq taamaasilluni inuuniarnikkut atukkat assigiinnerusumik atuutsinneqalernissaat anguneqarsinnaassammat iluaquisiiffiusumillu atuutsinneqalerluni.

Nunatsinni nukissiutit tassaapput atuisut akilersuinerisigut aningaasalersorneqartut taamaattumik nammaqatigiinneq atorlugu aamma akitigut atugassaqartitsinissaq pisariaqarpoq. Nammaqatigiinnerup nassatarisaanik akisussaaqatigiinneq atortinneqartussaavoq, sineriassuatsinni siammaseqisumik inoqarfiusumi pisariaqarpoq sumiiffiit sapinngisamik nammaqataaffiusumik peqatiginissaat, tamannalu anguniarlugu alloriaqqittariaqarpugut.

Siumumiit pingaartipparput Kalaallit Nunaanni paasissutissat tunngaviusariaqartut ullutsinnut naapertuuttut niuernerpalaartumik ingerlatsiviunissaat aammali piviusorsiorumik sumiiffinni illersuisumik ingerlatsinissamik eqqarsarluta oqimaaqatigiisitsisartussaalluta.
Killifimmi akisussaaffimmik tigusilluta pissutsit atuuttut iliuuseqarfinginissaat pingaartipparput, misilitakkallu takutippaat nammaqatigiinnerusumik ingerlatsinissaq suliniutigisariaqaripput sumiiffinni tamaginni inoqarfiusunik isiginnilluta ingerlariaqqissagutta – akisussaaffik uatsinniippoq.

Nunatsinni inuit ikittunnguuvugut nunarujussuarmik siammasissumik inoqarfiusumi inuulluta, taamaattumik kivitseqatigiinneq aqqutigalugu alloriaqqittariaqarpugut sumiiffinni unammilligasanut annerusumik nammaqataaneq atuutsikkumallugu.

Taamaasillugu aalajangiiffissatut siunnersuut matumuuna ingerlatipparput neriulluta aaqqiisuteqarnissamik akisussaaffik tigummisarput atorlugu alloriaqqinnissamut peqataaffiusinnaassasoq.

Namminersorlutik Oqartussanut pisortanullu aningaasatigut allaffissornikkullu kingunissai:
Naatsorsuutigineqarpoq nalilersuineq ingerlanneqarsinnaasoq aningaasaliissutaareersut iluanni. Ilimanarpoq ilinniagartuup ukiup affaata missaani misissuinissaanut aningaasaliisoqartariaqassasoq.

Namminersorlutik inuussutissartunut aningaasatigut allaffissornikkullu kingunissai:
Misissuinermut atatillugu toqqaannartumik sunniuteqassanngilaq.

Inunnut ataasiakkaanut aningaasatigut allaffissornikkullu kingunissai:
Misissuinermut atatillugu toqqaannartumik sunniuteqassanngilaq.